

## Plej granda kolekto da bildstrioj kaj humurbildoj en Esperanto

La retpaĝo bildetejo.net por bildstrioj kaj humurbildoj en Esperanto celebris sian unuan datrevenon. Dum sia unua jaro bildetejo.net senhalte kreskis, kaj nun enhavas pli ol 200 bildojn. Publikigante kvar pliajn bildojn en ĉiu semajno bildetejo.net ne ĉesos kreski en 2012 kaj serĉas pliajn tradukistojn kaj kunlaborantojn. Bildetejo.net ankaŭ disponigas la regulan humurbildon de la germana artisto „mil“ por *Esperanto aktuell*. <http://bildetejo.net/>

## Pli videbla rolo por UEA en la terminologia mondo

Mélanie Maradan, komisiito por la rilatoj de UEA kun la Internacia Organizaĵo por Normigado (ISO) kaj kun Infoterm, povis raporti pri pluraj atingoj. En Majo UEA kaj Infoterm subskribis interkonsenton pri kunagado, laŭ kiu UEA kaj Infoterm interŝanĝos informojn kaj kunlaboros pri projektoj, renkontiĝoj kaj eldonaĵoj pri terminologio, leksikografio, lingvistiko, lingvolernado kaj administrado de informoj kaj strukturitaj enhavoj. Infoterm ankaŭ proponis al UEA traduki la dokumenton Gvidlinioj pri terminologiaj politikoj por apero en la retejo de Unesko. <http://uea.org/dokumentoj/komunikoj/gk.php?no=440#1>

## Ĉu tro da lingvoj en EU?

La ekonomikaj sciencistoj Shlomo Weber (Southern Methodist University, Dallas) kaj Victor Ginsburgh (Bruselo) proponas al la EU-administrado rezigni pri 17 el 23 oficialaj lingvoj, ĉar sufiĉu la Angla, Franca, Germana, Itala, Hispana kaj Pola lingvoj. La lingva diverseco multekostas (pli ol 1 miliardon oni bezonas por tradukado) kaj malutilas al la ekonomio. Sed la ekonomikistoj ankaŭ diagnozas, ke du trionoj de la civitanaro estus malhelpataj per la

sola uzo de la Angla. Normoj, reguloj, diskutadoj restus nekomprenblaj. La gazeto Westdeutsche Allgemeine Zeitung opinias, ke la EU tre verŝajne ne supervivus la forigon de lingvoj kiel la Bulgara, Dana, ktp. La respekto je la individuaj naciaj kulturoj malpermesas reduktion de la lingva diverseco. [www.derwesten.de](http://www.derwesten.de), [www.presseportal.de](http://www.presseportal.de)

## Mortis Phil Bosmans

Phil Bosmans, iniciatinto de la „Movado sen nomo“, naskiĝis 1922 en Gruitrode, Limburgo, kaj estis belga katolika ordenano kaj aŭtoro de multaj edifaj verkoj. En 1941 li monaĥiĝis ĉe la monaĥoj Montfortanoj kaj en 1948 pastrigiĝis. Ekde 1957 li tute sin dediĉis al la realigo de „Movado sen nomo“. Ĝis 1991 P. Bosmans estis la prezidanto kaj delegita administranto de „Movado sen Nomo“. Tiu organizo volas estigi solidarecon inter ĉiuj homoj, sendepende de riĉeco, raso, deveno aŭ religio. La baza ideo de Bosmans estis, ke en la moderna socio, oni havas tro multe da atento por strukturoj, por tekniko kaj teknologio kaj emas forgesi la simplajn homajn bezonojn. Tial li emfazis la Kulturon de la Koro. Bosmans simpatiis kun Esperanto kaj komprenis ke ĝi havas eblecojn por plivastigi la horizonton por la mesaĝoj pri la Kulturo de la Koro. <http://users.skynet.be/jfa582651/msn/index.html>

## Aprezo de honor-ofice laborantaj personoj

Ŝtatoj pli kaj pli ekkonas la gravan rolon de honor-ofice laborantaj homoj por la socio. Do la Landa Konsilisto Dietrich Kübler disdonis 56 distingajojn en Reichelsheim al diversaj personoj. En Brombachtal estas honoritaj reprezentantoj ekzemple de la libervola fajrobrigado kaj ankaŭ Andreas Emmerich pro lia agado por Esperanto.

[www.echo-online.de/region/odenwaldkreis/reichelsheim](http://www.echo-online.de/region/odenwaldkreis/reichelsheim)

## La projekto pri reta PIV ne haltis

Por ellabori retan version de Plena Ilustrita Vortaro estas kolektitaj monkontribuoj de 10.000 eŭroj. La teknika parto evoluis tute bone, la platformo estas jam kreita kaj baldaŭ devos esti finitaj laboroj pri la fina aspektigo de la retejo. Novembre aperis bezono haltigi ĉiujn laborojn, ĉar evidentiĝis ke ĉe la redaktantoj de la vortaro akumuliĝis multe da traktinda materialo, surbaze de kiu ili volis prilabori la enhavon de la vortaro. Ĉar ne indus ciferecigi la enhavon, kiu tre baldaŭ iĝos malĝisdata, estis decidite atendi pli freŝan version. Relative baldaŭ estos bezonataj volontuloj, kiuj pretus provlegi la ciferecigitan enhavon.

[www.liberafolio.org/2012/la-projekto-pri-reta-piv-ne-haltis](http://www.liberafolio.org/2012/la-projekto-pri-reta-piv-ne-haltis)

## IJK okazos 2012 en Vjetnamio kaj sekvajare en Israelo

Post la subita rezigno de Japana Esperanto-Junularo, la TEJO-estraro alprenis la decidon pri okazigo de la Internacia Junulara Kongreso (IJK) 2012 en Hanojo, Vjetnamio – samurbe kiel la Universala Kongreso. Decidita estas ankaŭ loko de TEJO-kongreso en 2013 – ĝi okazos en Israelo. La fonduso Partoprenu IJK-n denove povas helpi al membroj de TEJO. Per ĝi eblas peti monon por parte kovri vojaĝkostojn, loĝadon en provizitaj ĉambroj kaj programkotizon: <http://tejo.org/eo/p-ijk>

## TEJO kaj Kontakto premias novajn membrojn

Ĉe la ttt-ejo Ipernity ekzistas TEJO kaj revuo *Kontakto* lanĉis abono- kaj membro-kampanjon, kiu disdonos premiojn por novaj membroj. Personoj, kiuj unuafoje aliĝos kiel individua membro de TEJO aŭ aparte abonos la revuon *Kontakto* komence de 2012, ricevos TEJO- aŭ *Kontakto*- T-ĉemizon. <http://www.tejo.org/eo/kampanjo-2012>

## La filmo **Universala Lingvo nun haveblas sur DVD**

La nova dokument-filmo pri la historio de Esperanto farita de Usona Oskar-nomumita reĝisoro Sam Green estas disponebla sur DVD. La filmo, produktita kun financa subteno de Esperantic Studies Foundation, prezentas la tumultan historion kaj humanismajn idealojn malantaŭ Esperanto. Ĝi estas unu el la kronikoj de Green pri utopia pensado kaj praktikoj. La filmo estas aĉetebla per la interreto ĉe <http://esperantodocumentary.com/en/store>.

[www.esperantic.org](http://www.esperantic.org)

## Esperanto enkondukita en pliajn superajn lernejojn de Pollando

Esperanto estas enkondukita interalie en du pliajn superajn lernejojn de Pollando, nome en Biała Podlaska (en la centrorienta parto de la lando) kaj en Kraków.

(Maria Majerczak, <http://esperanto-ret.o.org/ilei/> -> Agado de polaj Esperanto-instruistoj -> Statistiko)

## Jarĉefkunveno kaj nova estraro en Herzberg am Harz, la Esperanto-urbo

La nova estraro en Herzberg am Harz dum la venontaj tri jaroj estas la jena: Petro Zilvar (prezidanto) nun jam dum 35 jaroj, Harald Mantz (dua prezidanto), Zsófia Kóródy (vicprezidantino), Marika Frense (estraranino), Ursula Zilvar (kasistino), Mathias Reimann (estrarano) kaj Ewa Kukileka (novelektita estraranino). Kasrevizorino estas Helga Vogelsang. Anstataŭantoj estas d-ro Wilfried Hinrichs kaj Jürgen Tietz. Gabi Oturari estas la komisiitino por la nova Esperanto-projekto "Nacia Parko Harz". La plej granda defio en 2012 estos la organizado de la Internacia Fervojistia Kongreso (19.05. - 25.05.2012) kune kun Germana Esperanta Fervojistia Asocio.

## Esperanto estas akceptita de fama Korea universitato Kyunghee

Unu el famaj koreaj universitatoj akceptis Esperanton oficiale kiel unu el klerigaj lerno-objektoj en la kuranta jaro. Nun en Koreio, kvar universitatoj (Korea Fremdlingva universitato, Dankook, Wonkwang kaj Kyunghee) malfermis Esperanto-lecionon por siaj studentoj.

LEE Jungkee

## Filmo pri Tibor Sekelj

Ĉi-jare oni prifestas la 100-an datrevenon de Tibor Sekelj, kiu naskiĝis la 14-an de februaro 1912 kaj forpasis la 17-an de septembro 1988. Jam pasintjare UEA kontribuis al la informado pri Sekelj per ampleksa artikolo en la revuo *Esperanto* (junio 2011) kaj per prelego de Spomenka Štimec en la Malferma Tago de la Centra Oficejo la 26-an de novembro. La prelego estis filmata kaj ĝi estas nun spektebla en la Reta Kinejo de UEA.

(Gazetaraj Komunikoj de UEA, 443, 2012-02-09)

## Libroproduktado en Esperantujo – jaro 2011

Dum 2011 en la libromarkato aperis 172 libroj en/pri Esperanto, kun entute 19.775 paĝoj, iom malpli ol averaĝe dum la lastaj dudek jaroj. La plej aktiva Esperanto-eldonejo denove estis Monda Asembleo Socia, prizorgata de Vilhelmo Lutermano. La superrigardo por 2011, publikigita en la februara kajero de La Ondo de Esperanto, aperis en la novaĵ-retejo La Balta Ondo.

<http://sezonoj.ru/2012/02/208knig/>.

## Esperantista ministro en Slovenio

La iama esperantisto kaj ano de la Eŭropa Parlamento, Ljudmila Novak, estas la nova ministro pri "slovenoj eksterlande" en la freŝa registaro de

Slovenio. En sia posteno kiel eŭropa parlamentano ŝi antaŭ tri jaroj proponis enkondukon de Esperanto kiel komuna lingvo de Eŭropa Unio (EU). Novak en sia junaĝo studis Esperanton, kaj en 2007 partoprenis la kongreson de Eŭropa Esperanto-Unio en Slovenio. Ŝi proponis, ke EU pristudu la eblecon kaj utilecon de komuna artefarita lingvo en EU, ekzemple Esperanto.

Legeblas intervjuo en [www.liberafolio.org](http://www.liberafolio.org).

## Finiĝis la unua kursaro sur la Esperanto-Insulo en Hajnano

Februare finiĝis la kvarsemajna intensa kursaro sur la Esperanto-Insulo en Hajnano (Ĉinio). La aranĝon, kiu inkludis 200-horan intensan kurson por komencantoj, 144-horan pedagogian seminarion kaj du kursojn kadre de la Universitato de Esperanto. Partoprenis entute 130 personoj. Je la fino la partoprenantoj de la metodika kurso faris detalan analizon pri la kune pasigita monato. Fotojn kaj filmojn pri la kursaro kaj surinsula laboro oni povas trovi ĉe <http://www.ipernity.com/home/edukado.net> (<http://edukado.net/novajhjoj?id=215>)“

## Rezulto de la IKUE-balotoj 2011

Okazis baloto por la nova estraro de la Internacia Katolika Unuiĝo Esperantista (IKUE). El la voĉdonrajtigita membraro voĉdonis 249 personoj (55%). Estas elektitaj por la kvar jaroj 2012-2015 la prezidanto Daminelli Giovanni, la estraranoj Sarandrea Carlo, Šváček Miloslav, Svaldi Pier Luigi, Belošević Marija, Lepping Stefan kaj la membroj de la Konsilio de la Kontorevizorj: Cescotti Covelli Norma; Fossati Tiziana; Tomczak Krzysztof. (IKUE)

**Kolektis kaj prilaboris**  
Uwe Stecher